

19. maj 2022

**Qanoq ililluta inuiaqatigiittut Naalagaaffiit peqatigiit meeqqat pillugit isumaqatigiissutaanni nr.2-mi allassimasoq "Immikkoortitsisoqassanngilaq" nunatsinni atuutsissinnaavarput? Qanorlu meeqqat eqqugaasimasut inuiaqatigiinni akuutinneqartutut misigitissavagut?**

(Inatsisartuni ilaasortaq Aqqalu C Jerimiassen Atassut)

Siullermik oqallinnissamik siunnersuuteqartoq ,siunnersuutaanut imartuumut qutsavigiumavarput.

Siunnersuummi qitiutinneqarpoq Meeqqat angajoqqaaminniit arsaarinnissutigineqarsimasut. Taakkualu qanoq iliornikkut ulluinnarni avatangiisiminniit immikkoortinneqannginnissaat pillugu aammalu taakkununga ilaserinninnerunissaq qitiutinneqarluni.

Ilanngulluguttaaq eqqaaneqarpoq Meeqqat taamatut nalaataqarsimasut sakkortuumik qisuariaateqalersartut. Ilaatigullu kamammik annertoorujussuarmik ilumioqalersarlutik.

Siumumiit oqariartuutigissavarput Meeqqat eqqugaannginnissaat siunertaralugu siusinaartumik iliuuseqartoqarnissaa sakkutut pingaarluinnartutut isigigatsigu, soorlu Partiitta anguniagaanni ilaatigut ima allassimasoqarpoq "Meeqqueriviit Meeqqallu Atuarfii imminnut ataqatigiilluassapput" aamma "Meeqqat atuarfianni ingerlaaseq nalilersoqqissaarneqartariaqarpoq". Siumup anguniarpaa Naalagaaffiit Peqatigiit meeqqat pisinnaatitaaffiik oqariartuutaat atuarfinni pinngitsoorani atuartsissutigineqartariaqartoq.

Tassa siusissukkut meeqqat Meeraaqqerivinniit aallartittumik immersorneqartarnissaat pingaarutilerujussuurtut isigaarput. Taamatuttaaq ingerlaqqiffinni, Meeqquerivinni, Atuarfinnilu tamatuma malitseqarluni atuutsinneqarnissaa pingaartutut isigigatsigu.

Soorluttaaq Meeqqat illersuisuata politikerinut inassuteqaatai malillugit allaqqasoqartoq "Nalunngilarput pimmatiginnittarneq ataatsimoortut akornanni pisarnerusoq." Atuaqatigiit, inimiittut suliffimmiittulluunniit tamarmik sunnerneqartarput. Taamaammat pimmatiginnittoq pimmatigineqartorlu pineqanngillat. Taamaammat pimmatiginnittarneq pinaveersaartissagutsigu, kikkunnik tamanik peqataatitsiniartarnissarput pingaaruteqarpoq.

Tassuunakkut takusinnaavarput avatangiisit tamarmik taamatut immikkoortitsilluni iliuuseqartarnikkut sunnerneqartartut,taamaattumillu taamatut iliuuseqartarneq initoorujussusoq.

Soorunami Meeqqat angerlarsimaffiup avataanut inissinneqartarnerat sullissisunit nalilersorluarneqartarpoq, anguniagaasarluni Meeqqanut pineqartunut pitsaanerpaamik iliuuseqarusulluni sullissineq. Taamatutaaq ilisimavarput Meeqqat taamatut nalaataqartut tarnikkut annertoorujussuarmik nanertuutissinneqartarmata, ilaatigut inuunermik sinnerani ikimillusoq mamittuittumik peqalernerannik kinguneqarsinnaasartumik.

Ilisimavarput inuiassuit akornanni periuseq atorneqartartoq, tassa sanngiinnerusunik imaluunniit ulluinnarni atukkat nalunngissutsitta aqqani aallaavigalugit taamatut atugaqartunik nakkartitsiniartarnek immikkoortitsisarnerlu atugaammata. Ileqqoq tamanna ukiorpassuarni atuuppoq, taamaattussaannartulli isigineqannginnissaa anguniarutsigu siuliini taasattuut siusissumik iliuuseqartarnissaq avaqqussinnaanngilarput.

Meeqqat taamatut nalaataqarsimasut suliniarfigineqarnerat ataavartumik pitsaasumillu siunertaqartumik ingerlasoq nalunngilarput. Taamaakkaluatorli ilia ima sakkortutigisumik atugaqartarput allaat imminut toqunnissaq qimaaffissatut kisiat isigineqartarluni. Taamatullu pisoqartarnera ajoraluartumik takornartaanngilaq apeqquterpassuarnillu akineqarsinnaanngitsunik qimatsivigineqartarpugut.

Sapinngisamik pitsaanerpaamik iliuuseqartarnissaq tamatta kissaatiguarparput. Taamaattumillu iliuuserisinnaasat nalilersortuarnissaat pinngitsoorsinnaanngilarput. Ilaatigut misilittakkat aallaavigalugit pitsanngorsaataasinnaasut suut takuneqarsinnaalertarmata, aammalu iluatsinneqartut periutsit ilisimalikkat sapinngisamik siammarlugit ingerlanneqartarnissaat pinngitsoorneqarsinnaasanngimmata.

Siammasissumik iluatsinnerusumik iliuuseqassagutta pinngitsoorsinnaanngilarput aammattaaq Kommunit peqataalluinnartariaqarmata. Ilaatigut qulequtaq eqqartugarput pillugu periusissiorsimanissaat avaqqunneqarsinnaanngimmat. Tassami taamaasiornikkut suliniutaasussat nalorninaatsumik sullissisussanut siammasissumik atorneqarlutik iluaquisiinnaassammata. Taamatutaaq sulinissami tassani Meeqqap angajoqqaaminut uternissaa, angajoqqaallu ersarissumik suliniarfiginissaat qitiulluinnartariaqartut isumaqarpugut.

Taamatut nalaataqarsimasut sapinngisamik tarnip pissusaanik suliaqartunit sullinneqapallassinnaanerat pillugu aqutissiuussisoqarnissaa pinngitsoorneqarsinnaanngilaq. Tassami iliuuseqapallannissaq pisariaqarluinnartuummat, taamaattumillu piffinnut ornigussinnaasunik sillimasuartoqarnissaa pingaarutilittut isigaarput.

Taamatut oqaaseqarluta oqallinnissamut peqataanissamut qilanaarnerput oqaatigaarput oqallisissiaqarnermullu qujaqqilluta.

Jens Kristian Therkelsen, Siumut